

【经文信息】大正藏第 19 册 No. 1029

## 佛说安宅陀罗尼咒经 1 卷

No. 1029 [Nos. 1351-1355]

### 佛说安宅陀罗尼咒经

如是我闻。一时佛在舍卫国祇陀林中给孤精舍。与大比丘众千二百五十人大菩萨众四万人俱。娑婆世界主梵天王。释提桓因四大天王。提头赖咤天王毘楼勒[鞠-刂+奇]天王。毘楼博叉天王。毘沙门天王。将二十八部鬼师大将军。如是等诸天八万四千阿利多。将其子及眷属悉来在会。

尔时去此佛世界。过十万亿佛土。有世界名众花。佛号最胜灯王如来应供等正觉。今现在说法。遣二菩萨一名大光二名无量光。而告之言。善男子汝等持此陀罗尼咒。至娑婆世界与释迦牟尼佛。此咒多所饶益。能令众生长夜安隐。获大善利色力名誉。即说咒曰。

多跌他 波罗殊隶 殊隶 殊隶隶沙摩鞞摩诃娑摩鞞 娑慢帝 摩诃娑慢帝  
娑隶娑罗隶 莎呵

时二菩萨从佛。受持陀罗尼咒。譬如壮夫屈申臂项。众花国没到舍卫国祇陀林中给孤独精舍。时二菩萨前诣佛所。头面礼足却住一面。而白佛言。世尊去此世界过十万亿佛土。有世界名众花。佛号最胜灯王如来应供等正觉。今现在说法。遣我等来问讯世尊。少病少恼气力安不。诸弟子等。不为若魔若天若鬼若罗刹。若部多若鸠盘荼若富单那若毘舍遮。若饿鬼若阿修罗若迦楼罗若干人鬼。若干陀鬼疫病鬼。若使人狂鬼若乱人心鬼。若方道鬼若起尸鬼。若一日发病鬼。若二日若三日若四日乃至七日发病鬼。若常发病鬼。如是等诸横之所恼者。最胜灯王如来遣陀罗尼咒。来与世尊。亦欲令此娑婆世界众生长夜安隐。获大善利色力名誉。说咒如上。

尔时佛告阿难。汝当受持读诵通利。为他解说书写供养此陀罗尼咒。所以者何佛出世难。持是咒亦复甚难。阿难若有受持读诵通利。得大福利。

## 佛说摩尼罗亶经

---

【经文信息】大正藏第 19 册 No. 1029 佛说安宅陀罗尼咒经

【版本记录】CBETA 电子佛典 Rev. 1.6 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，北美某大德提供

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】

---